

# Tiwei Pita Kewisik - 1

## Menmen me tiwei ik

Pita katip mit ne sios gude 1:1-2

Him me God Haai kaktaihis mamno wit kirak 1:3-12

Pita katip mit hir ap nanwis menmen enum emamiwaank menmen yaaim in ek hir nisesim 1:13-2:10

Him me menmen mit ne weiwik me God nanisesim eme wi menmen enum mamnen mamiwaanki 2:11-4:19

Him me menmen mit ne sios hir nanisesim 5:1-11

Pita katip mit him mikaru 5:12-14

---

**1** <sup>1</sup>“Hi Pita nipaa Jisas Krai keriuweta hi hen hewepyapir him mirak, hi hewis tiwei ik ken yi mit. Nipaa mit han nepiri yi yinaaiwir Jerusalem yi yen yau provins Pontas, provins Galesia, provins Kapadosia, provins Esia metike provins Bitinia. Yi yar ke mitik keke wit hak kan ketikewi kaku kike, maain hirak pike kakno wit kirak eik. Mar im yi yau ti in me wi kike te maain yi yayi yi yaino yayu wit ki yaaik eik God kewik. <sup>2</sup>“God Haai kehimiteni yi mit nirak yentar hirak nipaa kerteiri han kitet kerekyi han ki yaaik prar prar yire tipar nemnok. Hirak kiriak menmen im keriuwe God Himin Yaaik te yi yises him me Jisas Krai, hemkre mirak merekyi yi yaain. Hi hanhan God han yaaik kirak kaku kaktikewi te yi eiyu werek werek. Hi hanhan menmen im yaaim mamu mamtikewi wisenum.

## Maain haiu mamu mamtike God haiu mamit menmen yaaim

<sup>3</sup>“Haiu emwenipi niuk me God hirak Haai ke Mitik Iuwe kiau Jisas Krai. Haiu emwenipiyek mamintar hirak han teweninai wisenum kerekyei haiu han kiau yaaik keriuwe Jisas Krai nipaa hirak kaa te God kikiak kekrit kepu. <sup>4</sup>“Te in ek haiu memerir menmen mamkaap himin kiau God kakwetayem. Hirak naanmiprayem meit wit kirak, menmen mamiwaankem au. Hiram yaaim prar prar, hiram mamu werek werek

---

<sup>a</sup> 1:1 Je 1:1   <sup>b</sup> 1:2 Ro 8:29; 2Te 2:13; Hi 12:24   <sup>c</sup> 1:3 2Ko 1:3   <sup>d</sup> 1:4 Kl 1:12

tipmain tipmain enum eik. <sup>5</sup>Menmen im hiram me yi mit kerek yi han kitet God naanmipri kentar hirak wisenuk ere yi yayit menmen God kemerir kakwepyapirem me wi maain Jisas pike kaknen ti.

<sup>6</sup>Yi han yaaik eiyu eiyintar menmen im God kakrekuyiem te in ek me wi kike yi han enuk kike yeriuwe menmen ham enum mamnen mamriwaank. <sup>7</sup>Menmen im mamnen te God kakir han ki kakirtei yi yisesik yeriuwe han ki karkeik. Mit hir newir gol mekre si ere meweikin mire tipar, hir neit menmen enum mewim mamno te gol keremem mepu. Mar im God kewis menmen enum mamnen mamriwaank te hiram mampar menmen enum mekre han kiau mamno ere menmen yaaim mekre han kiau, haiu mamises God werék werék. Menmen yaaim mekre han ki minin gol. Maain gol mamiwaank mamit te menmen mekre han ki au. Maain Jisas Krai pike kaknen kakwepyapir hirekes, yi eiyit niuk iuwe, God kaktip yi yaain, hirak kakweti menmen mirak yaaim iuwe. <sup>8</sup>Yi ap yir Jisas Krai wen au, te yi han teweninek. In ek yi ap yirek wen au, te yi yisesik yepu han yaaik wisenuk. <sup>9</sup>Him ap te mamwepyapir werék werék menmen mekre han ki. Yi han yaaik eiyintar menmen im: Yi yises God te hirak kaktihis, maain yi eiyu eitikerek.

<sup>10</sup>Me menmen im nipaa mit profet hir han kitet yapirwe nanirtei menmen werék werék hir newepyapirem me menmen im God kakrekuyiem kakwetiyeim. <sup>11</sup>Himin Yaaik ke Krai kekreri kewepyapir menmen enum mamiwaank Krai te maain hirak kakit niuk iuwe. Hir profet han kitetim nitehiyan nar ik: “Maain wi mamirkeim hirak kaknen? Mekam mamnen me wi im?” <sup>12</sup>Nipaa God epei keteiknor menmen hir newepyapirem hiram ap mamkepi au. Him im maain mamkaap yi mit keriyen me menmen im mit kerek newepyapir him yaaim me God hir netpiyem. In ek God Haai kesiuwe God Himin Yaaik kan kikaap mit in te hir netpi him im yaaim. Mit ensel hir mit God keriuweti niriak menmen mirak. Nipaa hir hanhan nertei menmen im me Krai, te hir au. God ketpor au hirak kepakinem.

### Yi mit eiriak menmen yaaim eiyu han yaaik prar prar

<sup>13</sup>Te yi han ekitet eiyu naanempre hiras. Yi han ekitet iuwe menmen yaaim God kakwetiyeim wi maain Jisas Krai pike kaknen kakwepyapir hirekes. <sup>14</sup>Yi yises God yire nikerek yaain nises him me miye haai. In ek yi ap han ekitet menmen enum mar ke nipaa yi yetari God yi hanhan yiriakem au. Em emit! <sup>15</sup>Te yi yire God hirak kari han ki yi eiyit menmen

<sup>e</sup> 1:5 Jo 10:28, 17:11    <sup>f</sup> 1:6 1Pi 5:10; Je 1:2    <sup>g</sup> 1:7 Jop 23:10; Pro 17:3; Ais 48:10; Sek 13:9; Mal 3:3; Je 1:3    <sup>h</sup> 1:8 Jo 20:29; 2Ko 5:7    <sup>i</sup> 1:9 Ro 6:22    <sup>j</sup> 1:10 Mt 13:16-17    <sup>k</sup> 1:11 Sam 22; Ais 53; Lu 24:26-27    <sup>l</sup> 1:12 Ef 3:10    <sup>m</sup> 1:14 Ro 12:2; Ef 2:3, 4:17-18

mirak yaaim. Hirak kepu han yaaik prar prar te yi yaipau han yaaik prar prar me menmen yapirwe yi yiriakem. <sup>16</sup>Yi eiriakem eiyintar God kewis him mau tiwei matip mar im: “Yi han yaaik prar prar eiyu eiyintar hi God hi han yaaik prar prar.”

### God ketaihis keriuwe menmen iuwe

<sup>17</sup>Hirak God skelim haiu mit yapirwe mipiran me menmen haiu mamriakem. Te yi mit kerek yi yenewek “Haai,” yi yetikerek yewepnak, yi naanempre hiras me menmen yi yiriakem. Me wi kike yi yau ti ik e, yi ap einip God han enuk kakirwi. <sup>18</sup>Yi eiriak menmen im hi hetpiyem eiyintar yi yertei God epei ketihs me menmen enum weinim nipaa yi yisesim, yi yetenenim me nipaa maamer ein niriakem neteikniyem. God ap kaktihs keriuwe winak pewek hiram mamiwaank au. <sup>19</sup>Hirak ketihs keriuwe hemkre yaaim me Krai. Krai hirak kire miyak sipsip wikes teknei makip au, yink hirak yaaik prar prar keit kar ke him me God Moses kewisim hiram metpim. <sup>20</sup>Nipaa God kewis ti wen au, hirak kehimitan Krai kaknen te hirak kemerir ere wi mikaru im e, hirak kakwepyapir hirekes kakikepi. <sup>21</sup>Te yi yises God yentar Krai. Hirak kaa te God kikiak kekrit kepu, hirak kewisiwek niuk iuwe te yi yisesik yemerir hirak maain kaktihs yi yayu yaitikerek.

### Yi han tewenin ni yinan

<sup>22</sup>Yi epei yiriak han ki yaaik prar prar yeriuwe him yaaim me God yi yisesim, te yi yemipin ni yinan au. Yi han tewenini. Yi han etweninan iuwe eiriuwe han ki yaaik prar prar. <sup>23</sup>God kerek yi yaain yeriuwe him mirak mamu tipmain tipmain enum eik yi yisesim. Him mirak mamiwaank au, te yi himin ki ap mamiwaank au. Yi yire nikerek ne Mitik luwe ap te kaki au. <sup>24</sup>Him im yaaim mentar him me God mau tiwei matip:

“Mit yapirwe hir nire yenkis, niuk iuwe mir hiram mire timen.

Maain mar ke yenkis meweivei mami, timen mamnep mamno ti mamisine mamit, te niuk iuwe me mit ne ti au mamit. <sup>25</sup>Te him yaaim me Mitik luwe hiram mamu tipmain tipmain enum eik.”

Him im hiram him keremem nipaa haiu epei metpiyem.

### Mitik Iuwe hirak kire teinik mitik kinan winak

**2** <sup>1</sup>Yi eiyipir menmen enum mekre han ki, him me memipin, eitip him wise tipar, hemkre menepam me menmen, yesiuwe him an.

<sup>n</sup> 1:16 Lev 11:44-45; Mt 5:48    <sup>o</sup> 1:17 Mt 6:9; Ro 2:11; 2Ti 4:14; Rev 2:23    <sup>p</sup> 1:18 1Ko 6:20  
<sup>q</sup> 1:19 Ap 20:28; Hi 9:12-14; 1Pi 1:2    <sup>r</sup> 1:20 Ap 2:23; Ef 1:4    <sup>s</sup> 1:21 Jo 14:6; Ro 4:24, 5:1-2, 10:9    <sup>t</sup> 1:22 Jo 13:34; Ro 12:10    <sup>u</sup> 1:23 Jo 1:13; Hi 4:12    <sup>v</sup> 1:24 Ais 40:6-8; Je 1:10-11  
<sup>w</sup> 2:1 Ef 4:22; Je 1:21

Menmen mar im emit! <sup>2</sup>xYi yire nikerek hemkre tuk hanhan nim, yi hanhan him yaaim me God te yi eire iuwe eiyirtei menmen me God werék werék. Yi hanhan him yaaim eiyisesim, <sup>3</sup>yeyintar yi epei yertei Mitik Iuwe hirak yaaik nepei kekepi kesak menmen enum yi yiriakem.

<sup>4</sup>Yi eiyises Jisas menep menep. Hirak kire teinik yaaik mit ne ti ninapen nepirek, te God han kitet hirak yaaik kehimitanek kime winak keriuwerek. Hirak kesak menmen enum haiu miriakem, hiram mire hirak kime winak ke God. <sup>5</sup>aYi mit yi yire teinik yaaik te God kaktihis kakrekyyi yi yire winak kirak, yi yen niutip yire weiwik miutip mirak. Yi eire mit pris. Nipaa hir nenep samiyak newisim mentar nan nesiyem newepwarem newet God em. Mar im menmen yaaim yapirwe yi yiriakem hiram me God yi eiwet God hiras yetike menmen yaaim yi eiriakem te God hanhanem kakintar menmen yaaim Jisas Kraiss epei kerekyyiem hirak kesak menmen enum mi. <sup>6</sup>bHim me God mau mekre tiwei matip mar im:

“Yi eiyimtwem. Hi ehimitan teinik mitik hewisik keit wit Saion kerp nimin kinan winak. Neimin nanisesik hir ap yink enuk nanriuwerek au.” Kraiss hirak teinik mitik kinan winak, hirak kakikepi kaktorhis. <sup>7</sup>cYi mit kerek yi yises Kraiss, yi han kitet hirak yaaik iuwe. Te neimin au, him me God matip mar im:

“Hirak kire teinik mit newep winak hir natip hirak enuk. Au, God katip hirak yaaik iuwe.” (Hirak kire teinik mitik kerp nimin kinan winak siup.) <sup>8</sup>dMit kerek hir ap nisesik au neweikin sip newetiwek, Kraiss hirak kire nan kenip mit nar ek nankenpetip minwik te hir naninkewin naniwaank hiras. Him me God mau tiwei matip me menmen im. Hiram matip mar ik:

“Ik ek hirak nan te mit nankenpetip maminwik naninkewin.”

### Haiu mit miyapir ne weiwik miutip me God

<sup>9</sup>eTe yi yar ik au. Yi ne weiwik miutip nipaa God kehimiteni, yi yire mit pris nirak kerek newenipi niuk mirak iuwe. Yi yire mit miyapir yiriak menmen me God keremem. Yi yire mit miyapir nirak te yi eiwepyapir menmen yaaim iuwe hirak kiriakem. Hirak kerekyyi te yi yeweikin sip me menmen enum mire witaan toto, yi yises him mirak yaaim hiram mire wepni kir. <sup>10</sup>fYi nipaa mit weinin te in ek yi ne weiwik me God. Yi nipaa God ap kekepi au, te in ek hirak kekepi wisenum.

x 2:2 Mt 18:3; 1Ko 3:2 y 2:3 Sam 34:8 z 2:4 Sam 118:22; Mt 21:42; Ais 28:16 a 2:5 Ef 2:21-22; Eks 19:6; Ais 61:6; Rev 1:6; Ro 12:1 b 2:6 Ais 28:16; Ro 9:33; Ef 2:20 c 2:7 Mt 21:42 d 2:8 Ais 8:14; Ro 9:33 e 2:9 Ais 43:20-21, 9:2; 1Pi 2:5; Ta 2:14; Ap 26:18; Ef 5:8 f 2:10 Ro 9:25; Hos 2:23

### Haiu emu emire mit miyapir ne God emriak menmen mirak

<sup>11</sup> <sup>g</sup>Nai yinan yaain, yi ne ti ik au. Yi yau in me wi kike keremem. Te hi epti him manp, yi einaaiwir menmen enum mekre han ki au emit! Menmen im hekrit hekrit mari han ki te yi yisesim yiriak enum. <sup>12</sup> <sup>h</sup>Yi yau yetike mit han hir ap nises God au. Te yi eiyises menmen yaaim yapirwe yi eiriakem keremem. Te mit enun hir nansiuwe him nantip yi enun, maain wi God pike kaknen skelim mit, hir nanwenipi niuk mirak nanintar menmen yaaim yi yiriakem.

<sup>13</sup> <sup>i</sup>Yi eiyises him me mit iuwe hir naanmipri eiyintar yi yises Mitik Iuwe God. Yi eiyises mitik iuwe ke gavman o <sup>14</sup> mitik hirak keriuweti naninen naanmamri. Hir nenep mit niriak enum te hir newenipi mit hir niriak yaaim. <sup>15</sup> <sup>j</sup>Yi eiriak menmen im eiyintar God hanhan yi yairiak mit enun him enum mir mami mamriuwe menmen yaaim yi yiriakem. <sup>16</sup> <sup>k</sup>Yi mit yepu yar ke mit ninaaiwir winak enuk menmen enum me ti meteneni au. Te yi ap yairiak enum eiyintar yi yepu yar ik au emit! Yi yire mit ne God yi yiriak menmen mirak te yi eiriak menmen yaaim keremem. Menmen enum au emit! <sup>17</sup> <sup>l</sup>Yi eiwenipi niuk me mit yapirwe, yi han etenin ni yinan, yi einaain einip God yink enuk ekirwi, yi eiwenipi niuk me mitik iuwe ke gavman kerek naanmipri me menmen.

### Haiu emises Kraiss me menmen hirak kiriakem

<sup>18</sup> <sup>m</sup>Yi mit kerek yiriak menmen me mit uwe ni, yi eiyimtau him mir yi eiyisesim te yi ap einipi hir yink enuk han enuk enriuwu. Mit han hir hanhani o hir han au enun naniwep, yi eiriakem eiyir ik. <sup>19</sup> Mitik hak iuwe kakiwep kakintar yi yises him me God, yi ap pike eikip emrerim au emit! Yi eiriak menmen im hi hetpiyem te God han yaaik kakirwi. <sup>20</sup> <sup>n</sup>Yi eiriak enum te mit iuwe hir naniyep te yi einip emrerim au, hiram menmen weinim. Te yi eiriak menmen yaaim, mit iuwe hir naniwep yi einip emrerim au, God kakrekyi yaaim eiyinterim. <sup>21</sup> <sup>o</sup>God hirak kehimiteni te yi eiyises menmen hi hetpiyem. Yi eiyisesim eiyintar nipaa Kraiss kaa kenteri, te hirak kire himin yaaik yi eiyisesim eiyir ke mitik kitet sak himin. <sup>22</sup> <sup>p</sup>Kraiss kiriak enum au, hirak ap kewenin him katip menmen enum au. <sup>23</sup> <sup>q</sup>Me wi nipaa mit hir netpiwek enum me nerekyiwek yink enuk, hirak ap keneri keriuwe him enum au. Mit hir nakip, hirak ap keneri kanip au. Hirak katip au. Hirak katin mesik kerp keit. Hirak han kitet God hirak maain skelim mit werek kaknip

<sup>g</sup> 2:11 Sam 39:12; Ga 5:17, 24; Je 4:1 <sup>h</sup> 2:12 Mt 5:16; Lu 19:44 <sup>i</sup> 2:13 Ro 13:1-7; Ta 3:1 <sup>j</sup> 2:15 1Pi 3:16 <sup>k</sup> 2:16 Ga 5:13 <sup>l</sup> 2:17 Ro 12:10; Pro 24:21; Mt 22:21 <sup>m</sup> 2:18 Ef 6:5 <sup>n</sup> 2:20 1Pi 3:14, 17, 4:14 <sup>o</sup> 2:21 Mt 16:24; Jo 13:15 <sup>p</sup> 2:22 Ais 53:9; Jo 8:46 <sup>q</sup> 2:23 Ais 53:7; 1Pi 3:9

nanrerik. <sup>24</sup>Hirak hirekes kaa kentar nu tentarakit ke menmen enum haiu miriakem te haiu mit mamnaaiwir menmen me ti enum te hiram ap mamri han kaiu. Hiram mar ke mitik kaki, himin kirak kaknaaiwir yink kirak te hirak ap pike kakriak menmen meiyam au. Te haiu mamu mamises menmen yaaim me God. Hirak kaa te kakikepai haiu mamu werek. <sup>25</sup>Yi nipaa yire miyak sipsip yinaaiwir yayiwe yeit yaank yi yetaritari te in ek yi epei yan yises Kraiss, hirak naanmipri himin ki kar ke mitik naanmipri sipsip.

### Mit netike miyapir neitan, hir enises menmen im

**3** <sup>1</sup>Yi miyapir yi eiyises him me mikan ni te hir han en ap nises him me God, te yi eiri han kir eiriuwe menmen yaaim yi yiriakem te hir enisesik. Yi ap eitip him au. <sup>2</sup>Hir enir yi miyapir yiriak yaaim yemtau him mir te hir enweikin han enises him me God. <sup>3</sup>Yi ap eises hiras eiriuwe wipe yehes, winak, pewek pitau keremem te mit natip yi yaain, au emit! <sup>4</sup>Menmen mekre han ki me yi yau werek werek yemtau him, hiram mire wipe yehes o pitau mau yink. Menmen mekre han mamiwaank mamir ke wipe yehes o pitau au. Te God hanhan menmen yaaim marim mekre han ki. <sup>5</sup>Marim, nipaa ein miyapir yaain hir nemerir menmen nipaa God ketpim kakwetirem. Hir nesese hiras nar ik. Hir nemtau him me mikan nir hir nisesim. <sup>6</sup>Sera hire wiriak menmen mar ik. Hire wemtau him me Ebrahim mitik kire, hire wisesim, hire watip, “Ti mitik kai iuwe.” Maain yi eiriak yaaim eiyises God, yi einaain au, te yi miyapir keriyen yi eire nikerek ne Sera.

<sup>7</sup>Mar im, yi mit epei yeit miyapir yi yau yetikeri yertei hir ap manpenun nar ke yi te yi naanmipror werek werek yentar yi yetikeri yayit menmen yaaim maain God kakweteiyem. Yi eiriak yaaim mar im te menmen enum ap meiyepet menmen yi yitehi God em kakweteiyem.

### Yi mit miyapir eikiyan eiyu eiyises menmen yaaim im

<sup>8</sup>Hi hetpi him kike keremem me menmen im. Yi yapirwe eiyu han kiutip hanhanan. Yi han etweninan, eiriakan yaaim, yi han ekitet yi yipiran. <sup>9</sup>Mit hir nerekyi enum, yi ap pike eirekyor enum emrerim au emit! Hir netpi enum newen henye, yi ap pike eirekyorem emrerim au emit! Yi eiyitehi God hirak kakrekyor yaaim eiyintar God epei kehimiteni yi eiyit menmen yaaim mirak. <sup>10</sup>Yi eiriakem eiyintar him me God mau tiwei matip mar im:

“Mit kerek hir hanhan nanu ti ik werek werek me tito yapirwe, hir eninaaiwir menmen enum me netpim newenin

<sup>r</sup> 2:24 Hi 9:28; Ro 6:2, 11; Ais 53:5    <sup>s</sup> 2:25 Ais 53:6; Esi 34:5-6; Mt 9:36; Jo 10:14

<sup>t</sup> 3:1 Ta 2:5; Mt 5:16; Ef 5:22    <sup>u</sup> 3:3 1Ti 2:9    <sup>v</sup> 3:6 Jen 18:12    <sup>w</sup> 3:7 Ef 5:25    <sup>x</sup> 3:9 Mt 5:44; 1Te 5:15; 1Pi 2:23    <sup>y</sup> 3:10 Sam 34:12-16

him. <sup>11</sup>Hir enweikin sip enwet menmen enum, hir enriak menmen yaaim. Hir hanhan nantike mit enkiyan enu enit. <sup>12</sup>Hir enriak menmen im enintar God hirak kir mit hir han kir yaaik, hirak hekrit hekrit kemtau menmen hir nitiwekhiyem hirak kakikepi. Te hirak keweikin sip kewet mit enun nises menmen enum, hirak kakrekyor enum mamrerim.”

#### **Mit neraiwaank nentar menmen yaaim haiu misesim**

<sup>13</sup>Yi hanhan eiriak menmen yaaim yi han kitet mit hir nanrekyi menmen enum a? Taau! <sup>14</sup>\*Yi eiriak menmen yaaim te mit nerekyi enum, yi han yaaik eiyu. Yi ap einapen mit han ekitetim au. <sup>15</sup>Yi hanhan Krai hirak ekinin eku han ki, hirak iuwe. Hekrit hekrit yi han etwenin mit kerek hir nitih i yi yenmak yi yises menmen me God mekre han ki, te yi eitporem han emikpep au. Yi einaain eiriak God yink enuk ekirwi. <sup>16</sup>“Han ki hirak yaaik keriuwe menmen yi yiriakem te maain mit hir neswi him me menmen yaaim yi yiriakem yentar yi yises Krai, hir yink enuk me menmen enum hir netpiyem. <sup>17</sup><sup>b</sup>Mit hir nerekyi enum me menmen enum yi yiriakem, hiram enum emit! Te God hirak kewis mit hir nerekyi enum me menmen yaaim yi yiriakem, hiram werek yi eiwisi nanrekyiyem.

#### **Krais kaa kakisak menmen enum haiu miriakem**

<sup>18</sup><sup>c</sup>Menmen im hiram werek mentar nipaa Krai kiriak yaaim te mit enun nakip hirak kaa kentar menmen enum maiu. Hirak yaaik kaa miutip keremen ke haiu mit enum te hirak kaktaihis, haiu mamnen God. Hirak mitik hirak kaa, te himin kirak kau keit. <sup>19</sup>Keriuwe himin kirak, Krai ken wit enuk mit epei naa himin kir kewik, hirak kewepyapir him mirak. <sup>20</sup><sup>d</sup>God kemeriror nisesik te hir ap nises him mirak me wi nipaa Noa kime sip iuwe au. Me wi im hir mit miyapir hispinak wikak (8) keriyen God kekepi te hir ap naa nentar tipar miniu au. <sup>21</sup><sup>e</sup>Tipar im hiram mire himin o piksa me mit hir nikiri neriuwe tipar. In ek tipar im mekepi ap mekemyetiti hapik mau yink ki au. Hiram me mit hir nitehi God kesak menmen enum mir hirak kakrekyor han kir yaaik, nentar Jisas Krai kaa pike kekrit kepu. <sup>22</sup><sup>f</sup>Hirak Krai epei ken wit ke God hirak kau menep his yaaim me God kerek hirak kehimitan mit iuwe nanwim. Mit ensel, herwe enum, himin yapirwe, hirak Krai kininem naanmiprewem.

<sup>a</sup> 3:14 Mt 5:10; 1Pi 2:20, 4:14; Ais 8:12-13    <sup>a</sup> 3:16 1Pi 2:12    <sup>b</sup> 3:17 1Pi 2:20    <sup>c</sup> 3:18 Ro 6:10; Ef 2:18    <sup>d</sup> 3:20 Jen 7:7, 23    <sup>e</sup> 3:21 Hi 10:22    <sup>f</sup> 3:22 Mt 22:44; Ef 1:20-21

### Yi eiyises han ke God me menmen yi yiriakem

**4** <sup>1</sup><sup>8</sup>Krais hirak kire mitik hirak kaa te yi han ekitet eiyir ke nipaa hirak han kitet menmen. Krais kewis mit enun hir nakip newaankek. Mit hir naniwep nanriwaank nanintar yi yises him me God, menmen im hiram werek mentar mit kerek hir yink kir kenen (o meiyewor) mit newaanki, menmen im mamkepi naninaaiwir menmen enum nipaa hir niriakem. <sup>2</sup><sup>h</sup>In ek yi ap eiyises han ki ke menmen yi yau ti ik yi yiriakem au emit! Yi eiyises God han kirak kerekek. <sup>3</sup><sup>i</sup>Wi nipaa haiu mises menmen enum yapirwe mit ne ti hir niriakem. Hiram mar im: Haiu mises menmen enum haiu hanhanem iuwe. Haiu mariyanhis meweninem, haiu maam tipar si enum ere metaritari, haiu maam menmen iuwe, te haiu men winak ke mit haiu maam tipar si enum keremem, haiu meweikin sip mewet him me God, haiu mewenipi niuk me tipir. <sup>4</sup>In ek mit han hir wen nises menmen enum im, han kir kekrit te yi yetikeri yisesim au. Hir natip enum nenipi yink enuk yi yetikeri yisesim meiyam au. <sup>5</sup><sup>j</sup>Te wi maain God skelim mit nepu, nantike mit nipaa naa, mit in hir enwepyapir nenmak hir niriak menmen enum mar im te maain hirak God kakiwaanki. <sup>6</sup><sup>k</sup>Hirak Krais kewepyapir him mirak yaaim men mit nipaa God kanip hir naa, nar ke God nipaa katip mit yapirwe maain hir nani. Krais kewepyapir him te mit kerek epei naa hir nemtau him mirak nanisesim, maain hir nantike God nanu nanit.

### Yi naanmipre menmen yaaim God kewetiyem

<sup>7</sup><sup>l</sup>Epei menep te menmen o ti haiu mewik hiram mamiwaank mamit, te yi han ekitet werek werek naanempre hiras me menmen yi yiriakem te yi yitehi God menmen werek werek. <sup>8</sup><sup>m</sup>Menmen im minin menmen yapirwe yi yisesim: Yi han etweninan eiyintar menmen im mamkepi yi ap han kitet menmen enum mit nerekiyiem. <sup>9</sup><sup>n</sup>Yi naanempre ni yinan nan nau netikewi me menmen o yeno, o menmen meiyam te yi ap han emikpep au emit! <sup>10</sup>Menmen yaaim God kekepi yi eiriakem, hiram mamkaap mit te yi eire mit yaain naanmipre menmen ham God kewetiyem. Hiram mar im: Mit han ne yi mit <sup>11</sup>kerek hir natip mit him me God, hir enwepyapir him me God keremem. Mit kerek hir niriak menmen nikaap mit neriuerem, hir enriakem enir ke mit God kekepi hir niriakem. Te mit nanwenipi niuk me God nentar menmen Jisas Krais kerekiyiem. Hi hanhan mit nanwenipi niuk mirak hirak iuwe, hirak naanmipre mit ne ti ik netike menmen yapirwe tipmain tipmain enum eik. Yi ap han kekrit eiyintar menmen enum mamiwep mar ke menmen nipaa menep Krais.

<sup>8</sup> 4:1 Ro 6:2, 7 <sup>h</sup> 4:2 1Jo 2:16 <sup>i</sup> 4:3 Ef 2:2-3 <sup>j</sup> 4:5 Ap 10:42 <sup>k</sup> 4:6 Ro 8:10; 1Ko 5:5  
<sup>l</sup> 4:7 Ro 13:11-12; 1Ko 10:11; 1Jo 2:18 <sup>m</sup> 4:8 1Pi 1:22; Je 5:20 <sup>n</sup> 4:9 Hi 13:2



**Menmen enum mamnen mamraiwaank  
mamir ke menmen mewaank Krai**

12<sup>o</sup>Nai yinan yaain, yi ap han kekrit eiriuwe menmen enum maain mamnen yi mit mamnini han ki te yi yises God werék werék o au. Yi ap han ekitet hiram menmen enum ham epei minin man au. Nipaa menmen im menep Krai. 13<sup>p</sup>Yi ap eihinhin au. Menmen enum nepei mepnen miwep mar ke hiram menep Krai. Yi han yaaik eiyu eiyintar maain Krai pike kaknen kakwepyapir hirekes, yi han yaaik iuwe eiriuwerek. 14<sup>q</sup>Mit hir netpi enum neni nentar yi yises Krai, yi han yaaik eiyu eiyintar Himin Yaaik Iuwe ke God kau kekleri. (Mit enun hir netpiwék enum te yi yewenipi niuk mirak.) 15<sup>r</sup>Yi ap eiriak menmen enum te mit ne gavman naniwep me menmen enum yi yiriakem mar im: Me yi yenep mit nani o yi yekintip menmen, o yi yiriak mit han enum enum o mitik hak ke yi mit hirak hanhan hirekes iuwe naanmipre mit han netike menmen mir. Menmen mar im au emit! 16<sup>t</sup>Mitik kerek mit enun nankip nanintar hirak kises him me God, hirak ap yink enuk au emit! Hirak ekwenipi niuk me God ekintar hirak kisesik.

17<sup>s</sup>Wi epei mamnen God hirak skelim mit. Hirak kinin skelim mit nises him mirak. Hirak kinin skelim haiu mit te maain mekam mamnen mit hir neweikin sip newet him yaaim me God? Hir naniwaank nanit. 18<sup>u</sup>Him me God mau tiwei matip,

“Mit nises him me God, hiram menmen enum mamnen mamiwaanki menep te mamri han kir te hir ap nanises God werék werék au. Menmen im mamnen mit kerek nises him me God, te mekam mamnen mit kerek niriak enum neweikin sip newet God? Hir naniwaank nanit.”

19<sup>v</sup>Te mit kerek menmen enum manip mewaanki nentar God hanhani, hir enriak menmen yaaim han emikpep au. Hir han kitet God. Hirak nipaa kiriak haiu mit yapirwe te hirak kakikepi naanemprai kentar hirak kakises him nipaa hirak ketpim.

**Yi mit iuwe naanempre mit miyapir ne weiwik me God**

**5** 1<sup>v</sup>Te hi hatip yi mit han ne yi mit miyapir ne weiwik me God yi yinin naanempre mit. Hi hetpi him manp. Hi hipre yi mit, haiu mit iuwe, hi nipaa hir Krai hirak kaa. Hi hetikerek hawir wawit menmen yaaim iuwe maain wi God kakwepyapirem. 2<sup>w</sup>Hi hetpi him manp: Yi naanempre mit miyapir ne God neit wit ki, hir nire sipsip

---

<sup>o</sup> 4:12 1Pi 1:6-7    <sup>p</sup> 4:13 Ap 5:41; Ro 8:17; 2Ti 2:12; Je 1:2    <sup>q</sup> 4:14 Sam 89:50-51; 1Pi 2:20  
<sup>r</sup> 4:16 Ap 11:26; Fl 1:20    <sup>s</sup> 4:17 Jer 25:29; 2Te 1:8    <sup>t</sup> 4:18 Pro 11:31; Lu 23:31    <sup>u</sup> 4:19 Sam 31:5  
<sup>v</sup> 5:1 Ro 8:17    <sup>w</sup> 5:2 Jo 21:15-17; Ap 20:28; Fm 14; Ta 1:11

nirak. Yi naanempror werek werek eiyr ke God hanhan yi eiriakem. Yi ap eiriakem eiyyantar mit netpiyem keremem au. Yi eiriakem eiyyantar yi hanhanem. Yi ap eiriakem te yi eiyyit pewek yapirwe emrerim au. Yi eiriakem eiyyantar yi hanhan eiriakem. <sup>3\*</sup>Yi ap eiriakem eiyyantar yi hanhan eiyyinin mit miyapir neit wit ki te yi eiyyitpor hir enriak menmen au emit! Menmen yi yiriakem hiram mire himin mamteikin mit miyapir ein menmen yaaim hir enisesim. <sup>4\*</sup>Maain wi Jisas Kraiss hirak kire Mitik luwe kinin naanmiprai haiu mit haiu mire sipsip nirak, maain hirak kakwepyapir hirekes, yi eitikerek eiyyit menmen yaaim mamiwaank au. Hiram mamu mamit tipmain tipmain enum eik.

### Haiu mamimtau him me mit hir ninin naanmiprai haiu mit

<sup>5\*</sup>Mar im hi hatip yi pipep him manp: Yi eiyyimtau him me mit kerek hir iuwe naanmipri yi eiyyisesi. Yi yapirwe eiyyimtau him me yi hiras eiyyantar him me God mau tiwei matip, “God keweikin sip kewet mit hir han kitet hiras iuwe, te hirak kikaap mit hir nau werek werek nemtau him nisesim, hirak kakrekoyor yaaim.” <sup>6</sup>“Him me God ketpim, te yi han kitet God hirak iuwe yi eiyyimtau him mirak eiyyisesim te maain wi kerek hirak kimat hirak kakrekoyi yaain, yi eire iuwe. <sup>7\*</sup>Menmen enum mamri han ki yi han ekitetim, yi eitip God em eiyyantar hirak hanhani kakikepi naanmipri.

<sup>8\*</sup>Yi han ekitet werek werek naanempre hiras. Hirak kepan ki Seten hirak kire hiwaak kepno in kepno ein kisawin kewenaan mitik hak kakikip kakiwaankek, hirak kinkatin mit kerek hirak kaknipi hir enweikin sip enwet God naniwaank hiras. <sup>9\*</sup>Yi han tokik eiyyu eiweikin sip eiwet Seten eiriuwe him yaaim me God yi yisesim. Yi eiriak menmen im eiyyantar yi yertei mit nises God nerer wit wit, menmen enum mewaanki nar ke hiram mewaank yi mit. Te menmen im mamkepi yi han tokik eiyyu. <sup>10\*</sup>Te maain wi meiyam menmen mamriwaank epei au, God hirak Haai ke menmen yaaim, hirak kehimiteni yi eiyyit menmen yaaim mirak mamu tipmain tipmain enum eik eiriuwe Kraiss, God hirekes kakrekoyi yi yaain kakrekoyi han tokik kakikepi. <sup>11</sup>Hi hanhan God hirak kinin naanmipre menmen yapirwe tipmain tipmain enum eik.

### Hi Pita hetpi him mei yinam kike

<sup>12</sup>Mitik Sailas hi han kitet hirak kaiu yinak yaaik, hirak kekepa kewis tiwei yinak ik ek. Hi hetpi him manp, hi hirekes heriuwe tiwei ik ek hi heteikni him yi yisesim hiram menmen yaaim me God. Yi han tokik eiyyu eiyyisesim.

\* **5:3** 2Ko 1:24; Fl 3:17; Ta 2:7    <sup>y</sup> **5:4** Hi 13:20; 1Ko 9:25    <sup>z</sup> **5:5** Ef 5:21; Je 4:6; Pro 3:34; Mt 23:12    <sup>a</sup> **5:6** Je 4:10    <sup>b</sup> **5:7** Sam 55:22; Mt 6:25-30    <sup>c</sup> **5:8** 1Te 5:6    <sup>d</sup> **5:9** Ef 6:11-13; Je 4:7    <sup>e</sup> **5:10** 1Te 2:12; 1Pi 1:6

<sup>13</sup>ƒNi yinan neit wit Babilon, God kehimiteni hir nirak, hir natip, “Yi yaain.” Mak hirak kire nikan kai hirak ketikewa hawir wises God, hirak katip, “Yi yaain”. <sup>14</sup>\*Me wi yi eirerik eiyir ni yinan eitipan yi yaain yi yapirwe ein yeyewewan. Hi hanhan yi mit miyapir ne Kraiss yi eiyu werek werek.

### **Mepir keremem**

---

<sup>ƒ</sup> 5:13 2Ti 4:11    <sup>\*</sup> 5:14 1Ko 16:20